

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 9 (1907)

Rubrik: La Romania dasl 1906 als 1907

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation


L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 02.02.2025

ETH-Bibliothek Zürich, E-Periodica, <https://www.e-periodica.ch>



La Romania dals 1906 als 1907.

Igl on vargau ei staus per la Romania oravontut in temps de reconquista e reorganisaziun. Ils dus ons precedents haveva l'uniun pitiu dal treranos — la redunonza dils 1905 era buca vegnida convocada, negina prestonza legitima steva pli alla testa, las finanzas fuvan sclavinadas, igl Ischi en retard. Ils ligioms, che uneschan ils commembers, eran pli e pli sluccai — bein enqualin de quels seregurdava strusch pli de far part dell'uniun e ha quei demussau refusond igl organ, in diember students fuvan aunc buca vegni acceptai el ravugl della sozietat.

Sch' ins leva restabilir e mantener l'uniun stuev' ins oravontut entscheiver cun reorganisar e reconquistar. La reorganisaziun ei daventada surtut tras la *redunonza generala a Mustér*, la reconquista principalmein tras *l'otgavla annada digl Ischi* redigida meisterilmein da Dr. C. Decurtins.

La 12 avla redunonza della Romania a Mustér.

Ils 18 de Settember 1906 ein circa 50 commembers della Romania, en quei ina roschada activs, seredunai en

la veglia venerabla stiva de dertgira dil cumin della Cadi. La tractanda principala fuva la *nomina d' ina nova redacziun*. Signur *Dr. C. Decurtins*, il qual haveva duront bunamein in decenni menau igl organ cun maun savieivel ed alzau el sin in scalem litterar-scientific adual a quel de semegliantas revistas neolatinas, haveva bandunond nossa tiara exprimiu la voluntat de seretrer dalla redacziun. Deplorond quella gronda perdita ha la redunonza concludiu de transmitter entras ina brev a *Dr. Decurtins* ils sentiments de viva renconuschientscha per ses gronds e dureivels merets.

La nova redacziun ei vegnida confidada a *prof. Dr. P. Tuor*. El medem temps ei vegniu scaffiu in *cussegl redacziunal*, il qual duei porscher agid ed assistenza alla redacziun en tuttas questions d'impurtonza. Sco tals cussegliers ein vegni tscherni *Dr. Cahannes* e plevon *Flor. Camathias* a Breil.

Tenor *rapport dil cassier* eis ei ella cassa in deficit de circa 100 fr., il qual vegn senza dubi levamein a vegnir ulivaus culla vendita dil proxim Ischi. Il quen vegn approbaus e *Dr. Cahannes* confirmaus per treis ons sco cassier.

Ella *nova prestonza* vegnan elegi:

Cathomas Gion Batt. med.: president,

Spescha August jur.: vicepresidente,

Desax Giusep rhet.: actuar,

e dals commembers honoraris: mistral *Gius. Condrau* redactor, mistral *Pieder Vincenz* advocat. 16 students vegnan pri si sco commembers activs.

Sco usitau tier las reuniuns della Romania ha ina *sessiun scientifica* suondau las tractandas ufficialas. P. decan *Maurus Carnot* ha porschiu in destinguiv referat sur il defunct poet nazional *Giachen Haspar Muoth*, descrivend

sia veta, siu operar sco historicher e poet, apprezziond sias pli bialas e pli gartiadas ovras. Plein anim ed admiraziun pil cau e menader nazional concluda la Romania de tschentar vid la casa nativa dil defunct a Breil ina tabla commemorativa e d'edir sias principalas ovras en fuorma manuala, propagond ellas aschia denter nies pievel.

Continuond la biala tradiziun, inaugurada gia tras reuniuns precedentas e confirmada tras las bialas lavurs de plevon Camathias en nies organ ha la redunonza a Mustér strenschiu aunc pli fetg ils ligioms, che rentan ils defensurs dil romontsch cun lur confrars, fegls della medema mumma latina, uregiaders sco els per ina sontga caussa nazionala. In representant dell' allontanada Catalogna *Dr. Benet R. Barios* de Barcelona ha portau en sia viarva nativa, aschi entelgeivla per l' ureglia romontscha, als fegls dellas alps reticas ils salids de lur confrars sper Llobregat e Monserrat. Cun grond applaus eis el vegnius beneventaus e declaraus commember honorari della Romania.

La sessiun scientifica ei vegnida curunada cun inaviseta allas interessantas antiquitats dell' epoca francona cavadas el novissim temps ord ina quort della claustra.

Sco natural ha la hilaritat studentica manteniu il pli ditg il camp. La biala ediziun della „Merlotscha“ cuntend in diember dellas megleras canzuns studenticas e popularas ha sligiau en schi leva maniera la veglia e spinusa questiun, co crear in agen cudischet per las canzuns de „commers“ romontschas.

Igl Ischi 1906.

El ei vegnius stampaus a Brüssel ella stamparia dellas Soras Grischas Franziscanas en in format elegant il pli savens usitau tier cudischs franzos, ed il qual ha anflau il general applaus dils lecturs. La spediziun ei daventada

cun gronda exactadat e premura tras igl actuariadat della Romania a Mustér. Nunditgond ils ualti numerus refusés ei tuttina in bi diember d' exemplars vegnius vendius, dattier de 400 tocs. Quei ei aunc bia memia pauc. Ton la biala novella sur la veta purila ed il studi sur relaziuns socialas e religiusas en nos vegls cumins, sco principalmein las biografias aschi actualas ed interessantas sur prof. Muoth e prof. Dr. Huonder meritassen de vegnir legidas en mintga stiva romontscha. Nus sperein per igl avegnir, che ton students sco augsegners ed era ils scolasts, dals quals zaconts paran deplorablamein aunc buca de capir la muntada de nossa uniun e de nies organ, vegnien ad entscheiver ina viva propaganda per quel en tuts nos vitgs ed ucclauns.

Il comite ha concludiu de dar dacheudenvi igl Ischi en squetsch alla stamparia Giusep Condrau a Mustér, la quala procura era la spediziun.;

La cassa.

Tras la vendita digl Ischi de 1906 e d' in diember d' exemplars d' annadas precedentas ei il deficit digl on passau buca mo vegnius ulivaus, anzi remplazzaus tras in saldo activ de 60 fr. Nus menzionein specialmein cheu ina unfrenda de 20 fr. retscharta da nies distinguiu e premurau confrar egl jester: Monsignor Willi, uestg de Limburg ed admettein ad el nies cauld engraziament.

Ils commembers.

Nus deplorein de buca saver publicar gia uon la glesta de commembers, ella duei suondar ella proxima annada. Nus dumbrein per il moment silmeins 350 commembers fidai e sperein ded augmentar en quort lur diember sin 400.

Ils defuncts.

La Romania ha piars tras la mort durant igl on passau ils suondonts commembers: Deplazes Giach. Ant., stud. phil., Surrein; Caduff Fidel, plevon, Ruschein; Peterelli Franz, cus. dils cantuns, Savognin; Prevost P. Carli O. S. B., rector, Sarnen; Reinhardt Heinrich, prof. dell' universitat de Friburg; Willi Gion, mechanicher, Cuera; Wolf P. Adalbert, Eucharistin, Clavadi. Els ruaussien en pasch!

